



**Sumáriu Kazu  
Tribunál Distritál Oekusi  
Maiu 2021**

**Afirmasaun:** Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Distritál Oekusi**

**1. Totál kazu ne'ebé JSMP monitoriza: 16**

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3 (a), no 35(b) no 36 (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	8
Artigu 157, 145 KP, konjuga ho artigu 2, 3, no 35(b) no 36 (LKVD)	Ameasa, ofensa ba integridade física simples ho natureza violénsia doméstika no tipu ilísitu sira kona-ba violénsia doméstika.	1
Artigu 177, 176 KP	Abuzu seksuál ba menór no pornografia infantil	1
Artigu 145 KP	Ofensa ba integridade física simples	1
Artigu 258 KP	Danu simples	1
Artigu 252 KP	Furtu agravadu	1
Artigu 316 KP	Kontrabandu	3
<b>Totál</b>		<b>16</b>

**2. Totál desizaun ne'ebé JSMP monitoriza : 12**

Tipu desizaun	Artigu	Númeru
Suspensaun ba prizaun nia ezelesaun	Artigu 68 KP	10
Omologa	Artigu 216 KP	2
<b>Totál</b>		<b>12</b>

**3. Totál kazu sira ne'ebé adia tuir JSMP monitorizasaun : 1**

Razaun adiamentu	Númeru
Ministeriu Públiku, defeza no arguidu ho lezada balun lamarka prezensa	1
<b>Totál</b>	<b>1</b>

**4. Total kazu sira ne'ebé kontinua prosesu tuir JSMP nia monitorizasaun : 3**

**B. Deskrisaun sumáriu julgamentu ba desizaun kazu sira**

**1. Krime ofensa ba integridade física simples ho natureza violénsia doméstika**

Nú. Prosesu : 0034/20.OEBCN  
 Kompozisaun Tribunál : Singulár  
 Juis : Dr. Hugo da Cruz Pui  
 Prokuradór : Dr. Mateus Nesi  
 Defeza : Dr. Calisto Tout  
 Desizaun : Pena prizaun fulan 9 suspende ba tinan 1

Iha 03 Maiu 2021, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu JA hasoru nia feen, iha Distritu Oekusi.

**Akuzasaun Prokuradór**

Prokuradór akuza katak iha 17 Setembru 2020, maizumenus iha oras tuku 01:00 madrugada, arguidu fila ba uma ho kondisaun lanu tebe dala ida iha lezada nia hasan parte karuk no tebe dala ida iha lezada nia kalilin parte karuk. Aktu sira ne'e rezulta lezada sofre bubu no moras iha hasan no kalilin. Kazu ne'e aneksa hamutuk ho relatóriu médiku husi Sentru Saude Baocnana no fotografia husi polísia kona-ba rezultadu violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

**Produsaun ba prova sira**

Iha julgamentu, arguidu deklara katak laos tebe lezada nia hasan maibé arguidu basa dala ida iha lezada nia hasan parte karuk no tebe dala ida iha lezada nia kalilin parte karuk. Arguidu hatene tebe lezada iha kalilin no basa hanesan ne'e ladi'ak no bele kauza lezada sofre moras, arguidu deklara mós katak arrepende nia hahalok, di'ak malu ona ho lezada no kontinua moris hamutuk iha uma ida to'o agora, foin primeiravés

halo krime no mai hatan iha tribunál, serbisu hanesan to'os na'in laiha rendimentu fixu kada fulan no iha oan na'in rua.

Iha parte seluk lezada kontinua konfirma faktu sira hotu iha akuzasaun no deklarata katak di'ak malu ona ho arguidu no depoisde akontesimentu ne'e arguidu la komete ona krime hasoru lezada.

### **Alegasaun finál**

Prokuradór haktuir katak arguidu hatene hela kuandu halo aktu violénsia ne'e bele rezulta ema seluk nia isin hetan bubu, kanek no moras, maibé arguidu hakarak halo nafatin. Prokuradór reforsa liután katak arguidu halo krime ne'e ho livre hasoru lezada ne'ebé tuir loloos arguidu mak tenke proteze lezada husi kualkér violénsia, maibé pelu kontráriu arguidu mak halo fali aktu violénsia hasoru lezada. Tanba ne'e, atu evita arguidu repete ninia hahalok ne'e ba lezada ka ema seluk, husu ba tribunál atu aplika pena ne'ebé hakerek ona iha artigu 145 KP.

Entretantu defeza husu ba tribunál atu fó pena ne'ebé adekua ba arguidu ho konsiderasaun sira katak arguidu iha kolaborasaun di'ak ho tribunál, arrepende nia hahalok, serbisu hanesan to'os na'in laiha rendimentu fixu kada fulan, iha oan na'in rua, diak malu ona no lezada, foin primeiravés komete krime no foin primeiravés mai hatan iha tribunál.

### **Desizaun**

Depoisde avalia faktu hotu ne'ebé prodús durante julgamentu tribunál prova katak arguidu tebe dala ida iha lezada nia hasan parte karuk no tebe dala ida iha lezada nia kalilin parte karuk. Aktu sira ne'e rezulta lezada sofre bubu no moras iha hasan no kalilin.

Bazeia ba faktu provadu hirak ne'e no tetu mós ho sirkunstánsia atenuante sira hanesan, arguidu kolabora ho tribunál, arrepende nia hahalok, foin primeiravés komete krime no primeiravés mai hatan iha tribunál, di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan sia no suspende ba tinan ida.

## **2. Krime ofensa ba integridade fízika simples ho natureza violénsia doméstika**

Nú. Prosesu : 0070/20.OESIC  
Kompozisaun Tribunál : Singulár  
Juis : Dr. Yudi Pamukas  
Prokuradór : Dr. Mateus Nesi  
Defeza : Dr. Calisto Tout  
Desizaun : Pena prizaun tinan 1 suspende ba tinan 1 fulan 6

Iha 04 Maiu 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AN hasoru nia feen, iha Distritu Oekusi.

### **Akuzasaun Prokuradór**

Prokuradór akuza katak iha 31 Maiu 2020, maizumenus iha oras tuku 08:00 dadeer, arguidu uza ai-saar baku dala ida iha lezada nia liman laran parte loos no basa dala ida iha lezada nia hasan parte loos no kontinua basa dala ida iha lezada nia reen-toos, aktu ne'e rezulta lezada sofre moras. Antes agresauñ ne'e, arguidu ho lezada diskute malu kona-ba lezada la prepara hahan meiudia nian. Kazu ne'e aneksa hamutuk ho relatóriu médiku husi Pradet no fotografia husi polísia kona-ba rezultadu violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha julgamentu, arguidu konfesa faktu hotu iha akuzasaun no deklara katak arrepende nia hahalok, dia'k malu ona ho lezada no promete sei la repete ninia hahalok ne'e hasoru lezada ka ema seluk iha futuru, foin primeiravés halo krime no mai hatan iha tribunál, hanesan to'os na'in laiha rendimentu fixu kada fulan no iha oan na'in haat. Arguidu haktuir tan katak depoisde akontesimentu to'o agora arguidu lahalo ona krime hasoru lezada.

Alende ne'e lezada kontinua konfirma faktu sira hotu iha akuzasaun no deklara katak depoisde akontesimentu to'o agora arguidu lahalo ona agresauñ fízika hasoru lezada no lezada di'ak malu ona ho arguidu.

### **Alegasaun finál**

Prokuradór konsidera arguidu ninia hahalok hirak ne'e provadu tuir faktu sira ne'ebé hakerek ona iha akuzasaun. Prokuradór konsidera arguidu laiha razaun atu halo agresauñ fízika hasoru lezada, tanba arguidu mós iha liman para tein kuandu lezada seidauk tein. Nune'e prokuradór konsidera arguidu ninia asaun ne'e priense duni elementu krime ofensa ba integridade fízika simples, nune'e husu ba tribunál atu aplika pena ne'ebé hakerek ona iha artigu 145 KP.

Entretantu defeza intende katak aktu violénsia ne'e akontese kuandu lezada ho arguidu diskute malu kona-ba lezada seidauk tein hahan. Defeza akresenta liután katak iha produsaun ba prova arguidu kolabora diak ho tribunál hodi konfesa integralmente sein rezerva, arrepende nia hahalok, di'ak malu ona ho lezada, iha oan na'in haat, serbisu hanesan to'os na'in laiha rendimentu fixu kada fulan no arguidu mak iha responsabilidade ba iha nia família. Tanba ne'e, husu ba tribunál atu aplika pena ne'ebé justu ba arguidu.

### **Desizaun**

Depoisde avalia faktu hotu ne'ebé prodús durante julgamentu, tribunál prova katak arguidu uza ai-saar baku dala ida iha lezada nia liman laran parte loos no basa dala ida iha lezada nia hasan parte loos no kontinua basa dala ida iha lezada nia reen-toos.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada, no foin primeiravés halo krime no mai hatan iha tribunál, laiha rendimentu fiksi kada fulan no iha oan na'in haat, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen.

### **3. Krime ameasa no ofensa ba integridade fízika simples ho natureza violénsia doméstika**

Nú. Prosesu : 0012/20.OEPSB  
Kompozisaun Tribunál : Singulár  
Juis : Dr. Hugo da Cruz Pui  
Prokuradór : Dr. Pedro Aleixo Baptista dos Santos  
Defeza : Dr. Calisto Tout  
Desizaun : Pena prizaun tinan 1 fulan 3 suspende ba tinan 1 fulan 6

Iha 04 Maiu 2021, Tribunál Distritál Oekusi prezide julgamentu leitura sentensa ba krime ameasa no ofensa ba integridade fízika simples ho natureza violénsia doméstika ne'ebé envolve arguidu PAS hasoru nia feen, iha Distritu Oekusi.

#### **Akuzasaun Prokuradór**

Prokuradór akuza katak iha 11 Novembru 2020, maizumenus iha oras tuku 12:30 madrugada, arguidu ho lezada diskute malu tanba arguidu deskomfia lezada amante ho mane seluk (*selinguh*), nune'e arguidu dehan ba lezada katak "*loron ida hau sei oho mate ó,*" dehan tiha nune'e arguidu kontinua basa dala ida iha lezada nia hasan parte loos no basa tan dala ida iha lezada nia hasan parte karuk no buti dala ida iha lezada nia kakorok no rakut lezada nia fuuk. Aktu sira ne'e rezulta lezada sofre moras no kanek kois iha kakorok. Kazu ne'e aneksa hamutuk ho relatóriu médiku husi Sentru Saude Pasabe no fotografia husi polísia kona-ba rezultadu violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD no artigu 157 KP kona-ba ameasa ho moldura penál to'o tinan 2 ka multa.

#### **Produsaun ba prova sira**

Iha julgamentu, arguidu konfesa parsialmente ba faktu sira iha akuzasaun katak basa duni dala ida iha lezada nia hasan parte loos no basa tan dala ida iha lezada nia hasan parte karuk no buti dala ida iha lezada nia kakorok no koalia duni katak "*loron ida arguidu sei oho mate lezada,*" maibé arguidu rezeita la rakut lezada nia fuuk. Arguidu hatene basa no buti kakorok ne'e ladi'ak no bele kauza lezada sofre moras, arrepende nia hahalok no tenta atu dame malu ho lezada no lori hikas lezada fila fali ba sira nia uma, maibé lezada mak lakohi ona arguidu no to'o agora seidauk di'ak malu ho lezada, tanba depoisde akontesimentu ne'e arguidu ho lezada hela separa, arguidu sei hadomi lezada no hakarak moris hamutuk fali ho lezada. Arguidu foin primeiravés halo krime no

mai hatan iha tribunál, serbisu hanesan to'os na'in laiha rendimentu fixu kada fulan no iha oan na'in rua.

Entretantu lezada kontinua konfirma faktu sira hotu iha akuzasaun no deklara mós katak antes akontesimentu ne'e arguidu ho lezada iha ona problema, seidauk dame malu ho arguidu, tanba depoisde akontesimentu arguidu ho lezada moris separa no lezada mós deklara liután katak laiha ona domin atu kontinua moris hamutuk ho arguidu.

### **Alegasaun finál**

Prokuradór konsidera arguidu provadu komete krime hasoru lezada bazeia ba deklarasaun arguidu nian no konfirmasaun husi lezada. Tanba ne'e, husu ba tribunál atu aplika pena prizaun tinan ida fulan neen no suspende ba tinan rua, atu nune'e arguidu la repete nia hahalok ne'e iha futuro no eduka ema seluk atu labele halo tuir.

Entretantu defeza husu ba tribunál atu fó pena ne'ebé adekuadu ba arguidu ho konsiderasaun sira katak arguidu kolabora di'ak ho tribunál, arrepende nia hahalok, foin primeiravés halo krime no mai hatan iha tribunál, arguidu mós tenta atu di'ak malu ho lezada no lori fila lezada ba sira nia uma, maibé lezada mak lakohi no arguidu serbisu hanesan to'os na'in laiha rendimentu fixu kada fulan.

### **Desizaun**

Depoisde avalia faktu hotu tribunál prova katak arguidu dehan ba lezada katak "*loron ida hau sei oho mate ó,*" basa dala ida iha lezada nia hasan parte loos no basa tan dala ida iha lezada nia hasan parte karuk no buti dala ida iha lezada nia kakorok no rakut lezada nia fuuk. Aktu sira ne'e rezulta lezada sofre moras no kanek kois iha kakorok.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu kolabora di'ak ho tribunál, arrepende nia hahalok, foin primeiravés halo krime no mai hatan iha tribunál, nune'e tribunál konklui prosesu ne'e no kondena arguidu ba krime ameasa ho pena prizaun fulan neen suspende ba tinan ida no ba krime ofensa ba integridade fízika simples ho pena prizaun tinan ida fulan neen no suspende ba tinan, tribunál halo kumulasaun no kondena arguidu ho pena únika tinan ida fulan tolu prizaun no suspende ba tinan ida fulan neen.

#### **4. Krime ofensa ba integridade fízika simples ho natureza violénsia doméstika**

Nú. Prosesu : 0078/20.OESIC  
Kompozisaun Tribunál : Singulár  
Juis : Dr. Yudi Pamukas  
Prokuradór : Dr. Mateus Nesi  
Defeza : Dr. Marcelino Marques Coro  
Desizaun : Pena prizaun tinan 1 fulan 6 no suspende ba tinan 2

Iha 05 Maiu 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DBF hasoru nia feen, iha Distritu Oekusi.

### **Akuzasaun Prokuradór**

Prokuradór akuza katak iha 16 Maiu 2020, maizumenus iha oras tuku 20:00 kalan, arguidu basa dala tolu iha lezada nia hasan parte loos no kontinua tuku dala tolu iha lezada nia ulun. Aktu ne'e rezulta lezada monu ba rai no lakon konsiensia (*desmaia*). Antes agresaun ne'e, arguidu ho lezada diskute malu kona-ba arguidu foin fila husi serbisu fatin iha tuku 20:00, nune'e lezada dehan ba arguidu "*tanba sa mak tuku 20.00 foin fila uma.*" Ho nune'e mosu agresaun hirak ne'e. Kazu ne'e aneksa hamutuk ho relatóriu médiku husi Pradet no fotografia husi polisia kona-ba rezultadu violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha julgamentu, arguidu konfesa faktu hotu iha akuzasaun no deklarara katak basa no tuku lezada hanesan ne'e ladi'ak no lezada bele sofre moras, arrepende nia hahalok, di'ak malu ona ho lezada no kontinua moris hamutuk iha uma ida to'o agora. Arguidu ho lezada hola malu iha tinan 2013, servisu hanesan funsionáriu iha Kooperativa KAIBAUK ho rendimentu kada fulan US\$251.00, iha oan na'in tolu no promete ba tribunál sei la repete hikas nia hahalok ne'e iha futuru.

Alende ne'e lezada kontinua konfirma faktu sira hotu iha akuzasaun no deklarara katak depoisde akontesimentu ne'e arguidu ho lezada dame malu kedas no moris hamutuk nafatin iha uma ida to'o agora no arguidu lahalo ona krime ruma hasoru lezada.

Tanba iha produsaun ba prova arguidu konfesa faktu sira hotu iha akuzasaun, nune'e prokuradór husu atu presinde testemuña nia depoimentu no parte defeza konkorda ho pedidu ne'e. Nune'e presinde testemuña FO ninia depoimentu.

### **Alegasaun finál**

Prokuradór intende katak aktu violénsia ne'e akontese duni tuir faktu sira iha akuzasaun nune'e konsidera arguidu nia hahalok ne'e priense duni elementu sira husi krime ofensa ba integridade física simples. Tanba ne'e, husu ba tribunál atu aplika pena ne'ebé hakerek ona iha artigu 145 KP atu iha futuru arguidu labele repete hikas nia hahalok ne'e hasoru ema seluk.

Entretantu defeza haktuir katak arguidu konfesa, arrepende nia hahalok, di'ak malu ona ho lezada, foin primeiravés halo krime no mai hatan iha tribunál no promete sei la repete ninia hahalok ne'e iha futuru, nune'e husu ba tribunál atu aplika pena ne'ebé adekua ba arguidu.

### **Desizaun**

Depoisde avalia faktu hotu ne'ebé produs durante julgamentu tribunál prova katak arguidu basa dala tolu iha lezada nia hasan parte loos no kontinua tuku dala tolu iha lezada nia ulun. Aktu ne'e rezulta lezada monu ba rai no lakon konsiensia (*desmaia*).

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravés halo krime no mai hatan iha tribunál, dí'ak malu ona ho lezada no promete sei la repete ninia hahalok ne'e iha futuru. Nune'e tribunál konklui prosesu ne'e no kondena arguidu ho pena prizaun tinan ida fulan neen no suspende ba tinan rua.

#### **5. Krime ofensa ba integridade física simples ho natureza violéncia doméstika**

Nú. Prosesu : 0174/19.OESIC  
Kompozisaun Tribunál : Singulár  
Juis : Dr. Yudi Pamukas  
Prokuradór : Dr. Mateus Nesi  
Defeza : Dr. Marcelino Marques Coro  
Desizaun : Pena prizaun tinan 1 no suspende ba tinan 1

Iha 05 Maiu 2021, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu FE hasoru nia feen, iha Distritu Oekusi.

#### **Akuzasaun Prokuradór**

Prokuradór akuza katak iha 11 Novembru 2019, maizumenus iha oras tuku 19:00 kalan, arguidu tuku dala ida iha lezada niaibun, basa dala ida iha lezada nia hasan parte loos, basa dala ida iha lezada nia hasan parte karuk no foti lezada nia tais mane ne'ebé sei foun hela hodi sunu tiha. Antes agresau ne'e, arguidu ho lezada diskute malu tanba arguidu fila ba uma ho kondisaun lanu, nune'e mosu agresau hirak ne'e. Kazu ne'e aneksa hamutuk ho relatóriu médiku husi Pradet no fotografia husi polísia kona-ba rezultadu violéncia sira ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

#### **Produsaun ba prova sira**

Iha julgamentu, arguidu konfesa faktu hotu iha akuzasaun. Arguidu hatene basa no tuku hanesan ne'e ladi'ak no kauza lezada bele hetan moras, arrepende nia hahalok no depoisde akontesimentu ne'e dí'ak malu kedas ho lezada no kontinua moris hamutuk iha uma ida to'o agora. Arguidu promete ba tribunál sei la repete ninia hahalok ne'e hasoru lezada ka ema seluk iha futuru, foin primeiravés halo krime no mai hatan iha tribunál, servisu hanesan to'os na'in laiha rendimentu fixu kada fulan no iha oan na'in ualu.



Alende ne'e lezada kontinua konfirma faktu sira hotu iha akuzasaun no deklarata katak depoisde akontesimentu lezada ho arguidu di'ak malu kedas no moris hamutuk nafatin iha uma ida to'o agora arguidu lahalo ona krime ruma hasoru lezada.

### **Alegasaun finál**

Prokuradór konsidera faktu sira ne'ebé iha akuzasaun ne'e provadu hotu, bazeia ba konfisaun arguidu nian no lezada ninia konfirmasaun, tanba ne'e husu ba tribunál atu aplika pena ne'ebé hakerek ona iha artigu 145 KP, nune'e iha futuru arguidu la repete ninia hahalok sira hasoru nia membru família ka ema seluk labele halo tuir.

Entretantu defeza husu ba tribunál atu aplika pena ne'ebé justu ba arguidu ho konsiderasaun sira katak arguidu konfesa, arrepende nia hahalok no depoisde akontesimentu di'ak malu kedas ho lezada no kontinua moris hamutuk iha uma ida to'o agora. Arguidu promete ba tribunál sei la repete ninia hahalok ne'e hasoru lezada ka ema seluk iha futuru, foin primeiravés halo krime no mai hatan iha tribunál, serbisu hanesan to'os na'in laiha rendimentu fixu kada fulan no iha oan na'in ualu.

### **Desizaun**

Depoisde avalia faktu hotu ne'ebé prodús durante julgamentu tribunál prova katak arguidu tuku dala ida iha lezada nia ibun, basa dala ida iha lezada nia hasan parte loos, basa dala ida iha lezada nia hasan parte karuk no foti lezada nia tais mane ne'ebé sei foun hela hodi sunu tiha.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravés komete krime no mai hatan iha tribunál no depoisde akontesimentu ne'e di'ak malu kedas ho lezada no kontinua moris hamutuk iha uma ida to'o agora. Arguidu mós promete ba tribunál sei la repete ninia hahalok ne'e hasoru lezada ka ema seluk iha futuru. Ho nune'e tribunál konklui prosesu ne'e no kondena arguidu ho pena prizaun tinan ida no suspende ba tinan ida.

## **6. Krime ofensa ba integridade física simples ho natureza violéncia doméstika**

Nú. Prosesu : 0008/20.OEPSB  
Kompozisaun Tribunál : Singulár  
Juis : Dr. Hugo da Cruz Pui  
Prokuradór : Dr. Mateus Nesi  
Defeza : Dr. Calisto Tout  
Desizaun : Pena prizaun tinan 1 fulan 9 no suspende ba tinan 2

Iha 05 Maiu 2021, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu BP hasoru nia feen MC ho nia oan feto DM, iha Distritu Oekusi.

### **Akuzasaun Prokuradór**

Prokuradór akuza katak iha 06 Outubru 2020, maizumenus iha oras tuku 08:00 dadeer, bainhira lezada halo kafe atu lori ba arguidu hemu, arguidu sai husi kuartu, arguidu nia

liman kona iha lezada nia hasan halo lezada hakfodak no kafe uituan fakar ba lezada nia isin, nune'e arguidu nervoju buti dala ida iha lezada DM nia kakorok, riba lezada ba rai no kontinua atu sama lezada, maibe lakonsege tanba lezada MC hakilar netik. Depoizde ne'e arguidu kontinua tuku dala ida iha lezada MC nia ibun no buti dala ida iha lezada MC ninia kakorok. Arguidu nia asaun ne'e rezulta lezada na'in rua hetan bubu no mean iha kakorok no ibun hetan kanek ki'ik no raan. Kazu ne'e aneksa hamutuk ho relatóriu médiku husi Sentru Saude Pasabe no fotografia husi polisia kona-ba rezultadu violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penal to'o tinan 3 ka multa, konjuga ho artigu 2, 3(a), 35(a no c) no 36 LKVD.

### **Produsaun ba prova sira**

Iha julgamentu, arguidu konfesa parsialmente katak arguidu buti de'it dala ida iha lezada DM nia kakorok, entretantu aktu ne'ebé arguidu komete hasoru lezada MC arguidu konfesa. Arguidu hatene buti iha kakorok no tuku lezada sira hanesan ne'e ladi'ak no lezada sira bele hetan moras, arrepende nia hahalok, di'ak malu ona ho lezada no kontinua moris hamutuk iha uma ida to'o agora, arguidu mós promete ba tribunál sei la repete ninia hahalok ne'e hasoru lezada ka ema seluk iha futuru, foin primeiravés halo krime no mai hatan iha tribunál, serbisu hanesan to'os na'in laiha rendimentu fixu kada fulan no arguidu ho lezada iha oan na'in neen.

Alende ne'e lezada MC konfirma faktu hotu iha akuzasaun no deklara mós katak depoizde akontesimentu ne'e arguidu ho lezada dame malu kedas no to'o agora sira moris hamutuk nafatin iha uma ida no arguidu la komete ona krime hasoru lezada na'in rua, alende ne'e lezada DM mós kontinua konfirma faktu sira hotu iha akuzasaun.

Testemuña TB nu'udar lezada MC nia inan depoimenta katak altura ne'eba kuandu to'o iha fatin akontesimentu testemuña haree lezada na'in rua tanis no konta sai problema ne'ebé mak akontese. Hafoin testemuña lori lezada na'in rua ba apresenta keixa iha polisia no kontinua ba halo tratamentu iha Sentru Saúde Pasabe, testemuña deklara tan katak kona-ba faktu sira ne'ebé akontese, testemuña rasik la haree ho matan.

Testemuña JS nu'udar arguidu nia inan depoimenta katak la haree ho matan kona-ba faktu sira ne'ebé akontese hasoru lezada na'in rua, maibe depoizde akontesimentu ne'e mak testemuña ba no fó hanoin de'it ba arguidu atu labele buti no baku lezada sira henesan ne'e no karik iha problema kolia de'it ho ibun.

### **Alegasaun finál**

Prokuradór konsidera faktu sira ne'ebé hakerek ona iha akuzasaun ne'e loos hotu, mezmu iha produsaun ba prova, arguidu rasik tenta atu subar tiha faktu balun, maibe lezada na'in rua konfirma, prokuradór mós haktuir katak tuir loloos arguidu tenke agradese tanba kuandu hader mai kafe manas prontu ona no hein de'it arguidu kose nehan para matabisu, maibe pelu kontrariu arguidu halo fali agresaun física hasoru lezada na'in rua. Prokuradór nota katak krime ne'ebé akontese entre membru família

mak maioria sempre julga hela de'it kada loron iha tribunál. Tanba ne'e, prokuradór husu ba tribunál atu aplika pena ne'ebé hakerek ona iha akuzasaun, nune'e iha futuru arguidu larepete ninia hahalok sira hasoru nia membru família ka ema seluk.

Entretantu defeza husu ba tribunál atu aplika pena ne'ebé adekuadu ho konsiderasaun sira katak arguidu kolabora, arrepende nia hahalok, di'ak malu ona ho lezada, serbisu hanesan to'os na'in laiha rendimentu fixu kada fulan, iha oan na'in neen, foin primeiraves halo krime no mai hatan iha tribunál no arguidu mak iha responsabilidade maximu ba iha nia família.

### **Desizaun**

Depoisde avalia faktu hotu ne'ebé prodús durante julgamentu tribunál prova katak arguidu buti dala ida iha lezada DM nia kakorok, riba lezada ba rai no kontinua tuku dala ida iha lezada MC nia ibun no buti dala ida iha lezada MC ninia kakorok.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu kolabora, arrepende nia hahalok, di'ak malu ona ho lezada, serbisu hanesan to'os na'in laiha rendimentu fixu kada fulan, iha oan na'in neen, foin primeiraves halo krime no mai hatan iha tribunál no arguidu mak iha responsabilidade maximu ba iha nia família. Ho nune'e tribunál konklui prosesu ne'e no kondena arguidu ho pena prizaun tinan ida fulan sia no suspende ba tinan rua.

### **7. Krime ofensa ba integridade física simples ho natureza violência doméstica**

Nú. Prosesu : 0050/19.OEBCN  
Kompozisaun Tribunál : Singulár  
Juis : Dr. Yudi Pamukas  
Prokuradór : Dr. Mateus Nesi  
Defeza : Dr. Marcelino Marques Coro  
Desizaun : Pena prizaun tinan 1 no suspende ba tinan 1

Iha 06 Maiu 2021, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu BLC hasoru nia feen, iha Distritu Oekusi.

### **Akuzasaun Prokuradór**

Prokuradór akuza katak iha 19 Novembru 2019, maizumenus iha oras tuku 17:00 lokraik, arguidu tebe sanan ne'ebé da'an hela batar iha ahi-matan hodi kona iha lezada nia kalilin to'o kanotak parte loos no rezulta lezada nia isin kulit nakloke no moras. Aktu ne'e akontese sein motivu ne'ebé klaru tanba arguidu ho kondisaun lanu. Kazu ne'e aneksa hamutuk ho relatóriu médiku husi Sentru Saude Baocnana no fotografia husi polísia kona-ba rezultadu violência sira ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(a) no 36 LKVD.

### **Produsaun ba prova sira**

Iha julgamentu, arguidu deklara katak laos arguidu tebe sanan iha ahi-matan, maibé arguidu la'ó mak arguidu nia ain sidi kona-ai ne'ebé tau iha ahi-matan sanan katik sai mak kona lezada nia kalilin to'ó kanotak parte loos. Depoizde akontesimentu arguidu lori kedas lezada ba halo tratamentu iha Sentru Saude Baocnana. Arguidu servisu hanesan to'os na'in laiha rendimentu fixu kada fulan, iha oan na'in ida, foin primeiravés mai iha tribunál.

Iha parte seluk lezada kotinua konfirma faktu hotu iha akuzasaun no deklara mós katak depoizde akontesimentu ne'e, arguidu lori kedas lezada ba halo tratamentu no depoizde akontesimentu ne'e arguidu la komete ona krime hasoru lezada.

### **Alegasaun finál**

Prokuradór haktuir katak mezmu iha produsaun ba prova arguidu tenta atu nega faktu sira iha akuzasaun, maibé lezada konfirma, nune'e prokuradór konsidera arguidu nia aktu ne'e priense duni elementu husi krime ofensa ba integridade física simples, tanba ne'e husu ba tribunál atu kondena arguidu tuir artigu 145 KP, atu iha futuru arguidu la repete hikas nia hahalok hasoru lezada.

Entretantu defeza haktuir katak arguidu laiha intensaun atu hakanek lezada tuir faktu sira iha akuzasaun, maibé hanesan arguidu ninia deklarasaun iha produsaun ba prova katak arguidu la'ó mak sidi kona ai-sunu ne'ebé tau iha ahi-matan. Defeza reforsa liu tán katak depoizde akontesimentu arguidu kontinua akompaña lezada ba halo tratamentu, iha oan na'in ida no arguidu mak iha responsabilidade ba iha nia família. Tanba ne'e, husu ba tribunál atu absolve arguidu maibé karik tribunál iha hanoin seluk husu ba tribunál atu aplika pena tuir konviksaun tribunál nian ne'ebé justu ba arguidu.

### **Desizaun**

Depoizde avalia faktu hotu ne'ebé prodús durante julgamentu tribunál prova katak arguidu tebe sanan ne'ebé da'an hela batar iha ahi-matan hodi kona iha lezada nia kalilin to'ó kanotak parte loos no rezulta lezada nia isin kulit nakloke no moras.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu foin primeiravés mai hatan iha tribunál no depoizde akontesimentu ne'e arguidu mak lori lezada ba halo tratamentu no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

### **8. Krime ofensa ba integridade física simples**

Nú. Prosesu	: 0003/21.OEPMK
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Pedro Baptista Aleixo dos Santos
Defeza	: Dr. Marcelino Marques Coro
Desizaun	: Omologa pedidu dezisténsia keixa

Iha 07 Maiu 2021, Tribunál Distritál Oekusi prezide julgamentu tentativa konsiliaun ba krime ofensa ba integridade física simples ne'ebé envolve husi arguidu Marcos Mani,

Anteiro Araújo Bino no Bernadete Nono hasoru lezadu Antonio Tefa, iha Aldeia Baqui, Suku Naimeco, Sub-distritu Pante-makasar, Distritu Oekusi.

### **Akuzasaun Prokuradór**

Prokuradór akuza katak iha 25 Dezembru 2020, iha oras tuku 10:50 Meiudia, arguidu Marcos dudu lezadu nia kotuk no arguida Bernadete hakbesik ba iha lezadu hodi les lezadu nia faru to'o nakles, hafoin arguidu Anteiro tuku dala ida iha lezadu nia hasan parte loos. Konsekuensia husi arguida no arguidu sira nia hahalok ne'e rezulta lezadu sofre moras no sente moe. Nune'e lezadu ba keixa problema ne'e iha Ofisiál Polísia Suku (OPS) Naimeco no ba halo tratamentu Iha Sentru Saude Baqui no fotografia husi polísia kona-ba rezultadu violénsia sira ne'e.

Prokuradór akuza arguida no arguidu sira kontra artigu 145 KP kona-ba krime ofensa ba integridade física simples ho moldura penál to'o tinan 3 ka multa.

### **Produsaun ba prova sira**

Bazeia ba artigu 262 Kódigu Prosesu Penál (KPP) kona-ba tentativa ba konsiliausaun, nune'e antes tama ba julgamentu produsaun ba prova, juis husu atu halo tentativa konsiliausaun ba arguida no arguidu sira ho lezadu.

Iha prosesu tentativa konsiliausaun ne'e, lezadu hakarak dame malu ho arguida no arguidu sira, maibé ho kondisaun katak arguida ho arguidu sira tenke fó indemnizasaun sivíl ba lezadu ho valor osan US\$150.00. Alende ne'e, arguida no arguida sira mós konkorda ho pedidu lezadu ni'an no deklara katak arrepende ona ba sira ninia hahalok no promete sei la repete tan hahalok hanesan iha futuru, nune'e lezadu husu ba tribunál atu deziste tiha ninia-keixa hasoru arguida no arguida sira.

### **Alegasaun finál**

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

### **Desizaun**

Bazeia ba akordu dame husi parte rua no pedidu dezisténsia husi lezadu. Nune'e tribunál konklui prosesu ne'e no omologa pedidu dezisténsia keixa ba prosesu refere, maibé ho kondisaun katak arguidu ho arguida sira tenke fó indemnizasaun ba lezadu ho valor osan US\$150.00.

### **9. Krime danu simples**

Nú. Prosesu	: 0004/21.OEPSB
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Pedro Baptista Aleixo dos Santos
Defeza	: Dr. Marcelino Marques Coro
Desizaun	: Omologa pedidu dezisténsia keixa

Iha 18 Maiu 2021, Tribunál Distritál Oekusi prezide julgamentu tentativa konsiliaun ba krime danu simples ne'ebé envolve arguidu Batista Poto hasoru lezadu Zeferino Safe, iha Aldeia Hueknutu, Suku Malelat, Sub-distritu Pasabe, Distritu Oekusi.

### **Akuzasaun Prokuradór**

Prokuradór akuza katak iha 12 Novembru 2020, iha oras tuku 12:00 meiodia, arguidu lori katana lere estraga hotu lezadu nia ai-oan sira iha to'os laran mak hanesan ai-mahoni hamutuk hun 32, ai-teka mutin hamutuk hun 40 no ai-nitas hamutuk hun 12 total ai ne'ebé arguidu estraga hamutuk hun 84.

Prokuradór akuza arguidu kontra artigu 258 KP kona-ba krime danu simples ho moldura penál to'o tinan 3 ka multa.

### **Produsaun ba prova sira**

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu ho lezadu.

Iha prosesu konsiliaun ne'e, lezadu hakarak dame malu ho arguidu sein kondisaun ruma, tanba sira rezolve ona problema ne'e iha suku, mezmu nune'e lezadu husu ba arguidu atu labele repete hikas nia hahalok ne'e hasoru lezadu ka ema seluk. Alende ne'e, arguidu mós konkorda ho pedidu lezadu nian no deklarata katak arrepende ona ninia hahalok no promete sei la repete tan hahalok hanesan iha futuru, nune'e lezadu husu ba tribunál atu deziste tiha ninia-keixa hasoru arguidu.

### **Alegasaun finál**

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

### **Desizaun**

Bazeia ba akordu dame husi parte rua no pedidu dezisténsia husi lezadu. tribunál konklui prosesu ne'e no omologa akordu dame ba prosesu refere.

### **10. Krime kontrabandu**

Nú. Prosesu	: 0045/17.OESIC
Kompozisaun Tribunál	: Koletivu
Juis	: Dr. Hugo da Cruz Pui, Dr. Evangelino Belo no Dr.Yudi Pamukas
Prokuradór	: Dr. Mateus Nesi
Defeza	: Dr. Calisto Tout
Desizaun	: Pena prizaun tinan 1 suspende ba tinan 1

Iha 28 Maiu 2021, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguidu Simon Colo hasoru Estadu RDTL, iha Aldeia Sakato, Suku Nipani, Sub-distritu Pante-makasar, Distritu Oekusi.

### **Akuzasaun Prokuradór**

Prokuradór akuza katak iha 09 Marsu 2017, maizumenus iha oras tuku 22:30 kalan, arguidu transporta sasan ilegal hanesan adubu (*pupuk*) hamutuk saku 13 ne'ebé hatama husi Indonezia liuhusi dalan ilegal mai iha teritóriu Timor-Leste. Bainhira arguidu halo hela tranzaksaun ba sasan adubu ilegal hirak ne'e, unidade polísia fronteira (UPF) halo kedas kapturasaun ba iha arguidu no prende hotu sasan ne'ebé arguidu hatama.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

### **Produsaun ba prova sira**

Iha julgamentu, arguidu konfesa faktu hotu iha akuzasaun no deklara katak depoisde polisia UPF halo kapturasaun, arguidu ho vontade continua selu kedas taxa ba Estadu liuhusi konta bankaria ministériu públiku nian. Arguidu promete sei la repete hahalok hanesan ne'e iha futuru no arguidu foin primeiravés halo krime no mai hatan iha tribunál, serbisu hanesan to'os na'in laiha rendimentu fixu kada fulan no iha oan na'in haat.

Prokuradór husu atu presinde testemuña husi polisia UPF, tanba arguidu konfesa no parte defeza laiha opsaun seluk. Tanba ne'e tribunál presinde testemuña nia depoimentu.

### **Alegasaun finál**

Prokuradór konsidera arguidu provadu komete krime tuir faktu iha akuzasaun bazeia ba konfisaun arguidu ni'an. Prokuradór reforsa liután katak maioria sidadaun sira ne'ebé hela besik iha fronteira mak halo tranzaksaun ilegal no situasaun henasan ne'e bele lori moras covid-19 ne'e tama mai iha Timor Leste. Tanba ne'e, prokuradór husu atu aplika pena ne'ebé todan ba arguidu tuir artigu 316 KP atu larepete hikas nia hahalok ne'e iha futuru.

Entretantu defeza husu ba tribunál atu aplika pena ne'ebé adekuaudu ho konsiderasaun sira katak arguidu konfesa, arrepende nia hahalok, foin primeiravés mai hatan iha tribunál no depoisde polisia halo kapturasaun arguidu ho vontade rasik selu kedas taxa ba estadu, arguidu iha oan na'in haat, servisu hanesan to'os na'in laiha rendimentu fixu kada fulan.

### **Desizaun**

Deposde avalia faktu hotu ne'ebé produs durante julgamentu tribunál prova katak arguidu transporta sasan ilegal hanesan adubu (*pupuk*) hamutuk saku 13 ne'ebé hatama husi Indonezia liuhusi dalan ilegal mai iha teritóriu Timor-Leste.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, foin primeiravés mai hatan iha tribunál, arrepende nia hahalok, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

## **11. Krime ofensa ba integridade fízika simples ho natureza violénsia doméstika**

Nú. Prosesu : 0103/20.OESIC  
Kompozisaun Tribunál : Singulár  
Juis : Dr. Hugo da Cruz Pui  
Prokuradór : Dr. Pedro Baptista Aleixo dos Santos  
Defeza : Dr. Calisto Tout  
Desizaun : Pena prizaun tinan 1 suspende ba tinan 1

Iha 31 Maiu 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu BM hasoru nia feen, iha Distritu Oekusi.

### **Akuzasaun Prokuradór**

Prokuradór akuza katak iha 20 Juñu 2020, maizumenus iha oras tuku 18:00 lokraik, arguidu buti dala ida iha lezada nia kakorok no dudu lezada to'o monu ba rai. Aktu ne'e rezulta lezada sofre moras. Antes agresaun ne'e, arguidu ho lezada diskute malu kona-ba lezada husu lezada nia kartaun eleitoral iha arguidu, maibé arguidu lakohi fó, nune'e mosu agresaun hirak ne'e. Kazu ne'e aneksa hamutuk ho relatóriu médiku husi Ospital Referál Oekusi no fotografia husi polísia kona-ba rezultadu violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha julgamentu, arguidu konfesa faktu hotu iha akuzasaun no hatene buti lezada nia kakorok no dudu lezada monu tun iha rai ladi'ak no bele kauza lezada hetan moras. Arguidu arrepende nia hahalok, promete sei la repete ninia hahalok ne'e hasoru lezada ka ema seluk iha futuro, foin primeiravés halo krime no mai hatan iha tribunál, di'ak malu ona ho lezada no hanesan to'os na'in laiha rendimentu fixu kada fulan no iha oan na'in rua.

Alende ne'e lezada kontinua konfirma faktu sira hotu iha akuzasaun no deklarata katak depoisde akontesimentu to'o agora arguidu lahalo ona agresaun fízika hasoru lezada no di'ak malu ona ho arguidu.

### **Alegasaun finál**

Prokuradór konsidera faktu hotu provadu bazeia ba konfisaun arguidu nian no konfirma mós husi lezada, prokuradór haktuir liután katak tuir loloos arguidu iha maneira seluk atu atua kualker problema tanba lezada hanesan arguidu nia parseiru intimu no laiha razaun atu halo fali agresaun fízika hasoru lezada, nune'e husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza husu ba tribunál atu kondena arguidu ho pena ne'ebé adekuadu ho konsiderasaun sira katak, arguidu konfesa, arrepende nia hahalok, di'ak malu ona ho



lezada, promete sei la repete ninia hahalok ne'e iha futuru, foin primeiravés halo krime no mai hatan iha tribunál, iha oan na'in rua, servisu hanesan to'os na'in laiha rendimentu fixu kada fulan no arguidu mak iha responsabilidade maximu ba iha nia familia.

### **Desizaun**

Depoisde avalia faktu hotu ne'ebé prodús durante julgamentu tribunál prova katak arguidu buti dala ida iha lezada nia kakorok no dudu lezada to'o monu ba rai.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu konfesa, arrepende nia hahalok, di'ak malu ona ho lezada, foin primeiravés halo krime no mai hatan iha tribunál no promete sei la komete tan krime hanesan hasoru lezada iha futuru, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

### **12. Krime kontrabandu**

Nú. Prosesu : 0156/19.OESIC  
Kompozisaun Tribunál : Kolektivu  
Juis : Dr. Evangelino Belo, Dr. Hugo da Cruz Pui no Dr. Yudi Pamukas  
Prokuradór : Dr. Pedro Baptista Aleixo da Silva  
Defeza : Dr. Marcelino Marques Coro  
Desizaun : Pena prizaun tinan 2 suspende ba tinan 2

Iha 31 Maiu 2021, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguida Sabina Aú hasoru Estadu RDTL, iha Aldeia Usapikolen, Suku Bobometo, Sub-distritu Oesilo, Distritu Oekusi.

### **Akuzasaun Prokuradór**

Prokuradór akuza katak iha 14 Setembru 2019, maizumenus iha oras tuku 06:00 dadeer, arguida transporta sasan ilegal hanesan gazolina litru 880 no gazoel litru 135 ne'ebé hatama mai husi Indonezia lihusi dalan ilegal mai iha teritóriu Timor-Leste. Bainhira arguida halo hela tranzaksaun ba mina ilegal hirak ne'e, Unidade Polísia Fronteira (UPF) halo kedas kapturasaun ba iha arguida no prende hotu sasan ne'ebé arguida hatama.

Prokuradór akuza arguida kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

### **Produsaun ba prova sira**

Iha julgamentu, arguida konfesa faktu hotu iha akuzasaun no deklara katak depoisde polísia UPF halo kapturasaun, arguida ho vontade rasik kontinua selu kedas taxa ba Estadu lihusi konta bankaria ministériu públiku. Arguida mós deklara katak arrepende nia hahalok no sei la repete hahalok ne'e iha futuru no foin primeiravés halo krime no mai hatan iha tribunál no laiha rendimentu fixu kada fulan no iha oan na'in rua.

Prokuradór husu atu presinde testemuña husi Unidade polisia fronteira (UPF) no husi parte defeza laiha opsaun seluk. Tanba ne'e tribunál presinde testamuña nia depoimentu husi prosesu refere.

### **Alegasaun finál**

Prokuradór laiha duvida ba faktu sira ne'ebé hakerek ona iha akuzasaun tanba iha produsaun ba prova arguida konfesa integralmente. Prokuradór mós reforsa liután katak maioria sidadaun sira ne'ebé hela besik iha fronteira mak halo tranzaksaun ilegal no situasaun henesan ne'e bele lori moras covid-19 ne'e tama mai iha Timor Leste. Tanba ne'e, prokuradór husu atu aplika pena ne'ebé todan ba arguida no tuir artigu 316 KP atu larepete hikas nia hahalok ne'e iha futuru no ema seluk labele halo tuir.

Entretantu defeza husu ba tribunál atu aplika pena ne'ebé kmaan ho konsiderasaun sira katak arguidu konfesa, arrepende nia hahalok, foin primeiravés halo krime no mai hatan iha tribunál, laiha rendimentu fixu kada fulan, iha oan na'in rua no promete sei la repete hahalok ne'e iha futuru, depoisde akontesimentu ne'e iha vontade rasik selu fali taxa ba estadu.

### **Desizaun**

Depoisde avalia faktu hotu ne'ebé prodús durante julgamentu tribunál prova katak arguida transporta sasan ilegal hanesan gasolina litru 880 no gazoel litru 135 ne'ebé hatama mai husi Indonezia lihusi dalan ilegal mai iha teritóriu Timor-Leste.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravés halo krime no mai hatan iha tribunál, laiha rendimentu fixu kada fulan, iha oan na'in rua no promete sei la repete hahalok ne'e iha futuru, depoisde akontesimentu ne'e iha vontade rasik selu fali taxa ba estadu. Nune'e tribunál konklui prosesu ne'e no kondena arguida ho pena prizaun tinan rua suspende ba tinan rua.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)